

Keberhasilan 2024, pelan 2025 serlah wibawa Jabatan Peguam Negara

- AGC membantu Malaysia meraih kemenangan dalam kes berkaitan diskriminasi minyak sawit terhadap Kesatuan Eropah, menunjukkan kemampuan AGC mempertahankan kepentingan negara di pentas global

- AGC bakal memperluaskan peranan atase undang-undang di institusi antarabangsa, termasuk di WTO, Geneva dan melaksanakan perjanjian baharu dengan Amerika Syarikat serta Iran menangani jenayah rentas sempadan dan pemindahan banduan antarabangsa



Timbalan Dekan (Hal Ehwal Pelajar dan Alumni), Pusat Pengajian Undang-Undang, Universiti Utara Malaysia (UUM)

Oleh Prof Madya Dr Asmar Abdul Rahim
bhrencana@bh.com.my

2024 menyaksikan pencapaian pelbagai inisiatif dan reformasi penting Jabatan Peguam Negara (AGC), bukan sahaja memberi impak besar kepada sistem perundangan negara, tetapi memperkukuhkan kedudukannya di persada antarabangsa.

Dalam tempoh ini jabatan itu berjaya mengukuhkan peranannya menegakkan keadulan undang-undang di Malaysia. Walaupun jawatan Peguam Negara berubah, komitmen jabatan ini untuk menegakkan keadilan kekal utuh, berlandaskan prinsip ketelusan dan keadilan.

Sebagai penasihat utama undang-undang kerajaan, AGC memainkan peranan penting mengubal beberapa undang-undang baharu dan meminda undang-undang sedia ada:

- Pindaan Perlembagaan 2024
Memberi hak kewarganegaraan secara automatik kepada kanak-kanak lahir di luar negara kepada ibu warganegara Malaysia. Inisiatif ini menunjukkan komitmen AGC terhadap kesaksamaan dan hak asasi manusia.
- Akta Keselamatan Siber 2024
Memastikan rangka kerja keselamatan siber negara kukuh bagi menghadapi ancaman siber.
- Akta Kawalan Produk Merokok Demi Kesihatan Awam 2024
Melindungi kanak-kanak dan remaja daripada bahaya rokok elektronik dan vaping.
- Akta Agensi Kawalan dan Perlindungan Sempadan Malaysia 2024
Menyatukan agensi kawalan sempadan untuk mengurangkan kesesakan dan meningkatkan kecekapan.
- Akta Keterangan Saksi Kanak-Kanak 2007 (Pindaan)
Memberi kuasa kepada mahkamah untuk menggunakan keterangan saksi kanak-kanak tanpa keperluan pengesahan tambahan.
- Akta Audit 1957 (Pindaan) memperluaskan kuasa Ketua Audit Negara untuk memastikan pengurusan kewangan awam lebih telus.

Selain itu, AGC juga memainkan peranan penting pengendalian 1,056 permohonan semakan hukuman mati dan penjara sepanjang hayat mengikut Akta Semakan Hukuman Mati dan Penjara Sepanjang Hayat (Bidang Kuasa Sementara Mahkamah Persekutuan) 2023.

Keberhasilan ini adalah bukti kerja keras pasukan AGC dalam memastikan sistem keadilan jenayah terus relevan dan manusiawi.

AGC turut berjaya mengukuhkan kedudukan Malaysia pada peringkat antarabangsa seperti:

- Pertikaian Pertubuhan Perdagangan Dunia (WTO) dengan Kesatuan Eropah
AGC membantu Malaysia meraih kemenangan dalam kes berkaitan diskriminasi minyak sawit terhadap Kesatuan Eropah (EU), menunjukkan kemampuan AGC mempertahankan kepentingan negara di pentas global.
- Konvensyen Pertubuhan Bangsa-Bangsa Bersatu (PBB) menentang jenayah siber
AGC memastikan kepentingan Malaysia tercermin

dalam draf konvensyen ini.

Pendapat Penasihat Mahkamah Keadilan Antarabangsa (ICJ) Mengenai Wilayah Palestin
AGC membuktikan kepakarannya dengan mewakili Malaysia di ICJ dalam pendengaran berkaitan dasar Israel di wilayah Palestin diduduki dalam usaha mempertahankan hak rakyat Palestin di arena antarabangsa.

Perubahan kepentingan kerajaan

Selain itu, AGC berjaya mempertahankan kepentingan kerajaan dalam kes berprofil tinggi seperti:

- Keputusan syariah tidak boleh disemak Mahkamah Sivil
Ia bagi menegakkan perbezaan bidang kuasa sivil dan syariah.
- Larangan Buku 'Gay is OK'
Mempertahankan keputusan larangan dikeluarkan Menteri Dalam Negeri.

Sebagai langkah ke arah pendigitalan, AGC memperkenalkan inisiatif meningkatkan kecekapan pengurusan kertas siasatan dan pengendalian representasi peguam menerusi:

- Sistem e-Daftar untuk merekodkan kertas siasatan jenayah secara dalam talian.
- Sistem e-Representasi bagi memudahkan pengurusan representasi undang-undang secara dalam talian.
- Sistem Pelaporan Keputusan Kes (LKK i-AGC) dapat mempercepatkan arahan lanjut kepada pendakwa raya selepas keputusan mahkamah rendah.

Semua usaha ini adalah seiring dengan transformasi digital kerajaan yang lebih lestari dan responsif.

AGC juga komited dalam usaha mendekati masyarakat seperti:

- Program Kampung Angkat MADANI - Menggerakkan infrastruktur asas dan program kebajikan di Kampung Jilid 8, Kedah.
- Kerjasama akademik - Menjalinakan hubungan

dengan universiti tempatan untuk meningkatkan profesionalisme undang-undang.

Selain itu, antara pelan strategik AGC untuk 2025 adalah penubuhan pejabat baharu, penubuhan cawangan Bahagian Rayuan dan Perbicaraan di Sabah dan Sarawak, pemindahan Pejabat AGC Kuala Lumpur ke Menara MATRADE dan menaik taraf tujuh pejabat pendakwa raya daerah, termasuk di Ampang dan Bukit Mertajam.

AGC juga akan mewujudkan 80 jawatan baharu untuk Timbalan Pendakwa Raya dan Peguam Persekutuan bagi memenuhi keperluan kes semakin meningkat.

Dalam kerangka antarabangsa, AGC bakal memperluaskan peranan atase undang-undang di institusi antarabangsa, termasuk di WTO, Geneva dan melaksanakan perjanjian baharu dengan Amerika Syarikat (AS) serta Iran dalam menangani jenayah rentas sempadan dan pemindahan banduan antarabangsa.

Semua komitmen AGC ini diperkuatkan dengan pelantikan Datuk Mohd Dusuki Mokhtar sebagai Peguam Negara yang membawa nafas baharu kepada AGC.

Dengan latar belakang pendidikan kukuh dan pengalaman lebih tiga dekad, Dusuki terbukti sebagai tokoh berkualiti tinggi.

Lulusan Universiti Islam Antarabangsa Malaysia (UIA) dan Universiti Wollongong, Australia, beliau memimpin pelbagai kes berprofil tinggi termasuk kes pencerobohan Lahad Datu, Sabah dan cabaran perundangan berkaitan 1Malaysia Development Berhad (1MDB).

2024 membuktikan kecekapan dan dedikasi AGC dalam menyokong agenda kerajaan dan memperkukuh kedaulatan undang-undang.

Pelan 2025 dirancang pula menunjukkan kesungguhan AGC untuk terus maju ke hadapan, selari dengan visi Malaysia MADANI.

Dengan kejayaan dan usaha berterusan, AGC kekal sebagai institusi penting dalam memastikan keadilan dan kestabilan negara.

